

AUGLÝSING

um verklagsreglur Orkuráðs við meðferð láns- og styrkumsókna úr Orkusjóði.

Verklagsreglur og skilyrði fyrir styrkveitingum úr Orkusjóði.

Styrkveitingar úr Orkusjóði.

1. Í fjárhags- og greiðsluáætlun Orkusjóðs ár hvert skal ákveðið það fjármagn, sem til ráðstöfunar er til styrkveitinga hverju sinni.
2. Styrkveitingar úr Orkusjóði skulu auglýstar árlega í upphafi árs eftir nánari ákvörðun orkuráðs. Auglýst skal í fjölmiðlum og á heimasíðum Orkustofnunar og iðnaðarráðuneytis.
3. Orkuráð getur ákvarðað fyrir hvert ár eða tímabil í senn, að styrkveitingar sjóðsins takmarkist við verkefni innan afmarkaðs hluta þeirra sviða, sem heimilt er að styrkja samkvæmt 2. grein reglugerðar nr. 514/2003.
4. Meginregla við styrkveitingar skal vera, að styrkur úr Orkusjóði nemi að hámarki 50% af áætluðum kostnaði einstakra verkefna.
5. Nú er það mat orkuráðs, að verkefni sé þess eðlis að rétt sé með tilliti til lögbundins hlutverks sjóðsins og nauðsynlegt til að tryggja framgang verkefnis, að vikið sé frá þessari meginreglu og er ráðinu þá heimilt að leggja til hærri styrkhlutfall með sérstökum rökstuðningi við tillögugerð til iðnaðarráðherra.
6. Umsækjendur skulu skila umsóknum til Orkusjóðs á sérstökum umsóknareyðublöðum. Í umsókninni skal koma fram nákvæm skýring á eðli og tilgangi verkefnis, kostnaðaráætlun og fjármögnun þess.
7. Að umsóknarfresti liðnum skulu umsóknir lagðar fyrir orkuráð. Meti orkuráð það svo að umsókn falli utan lögbundins hlutverks Orkusjóðs, sé sjóðnum ofviða vegna fjárhagslegs umfangs eða falli utan ramma auglýsingar um styrkveitingar tilkynnist umsækjanda sú niðurstaða skriflega.
8. Að lokinni yfirferð umsókna skulu þær ásamt fylgigögnum sendar Orkustofnun til umsagnar.
9. Að fengnum umsögnum Orkustofnunar tekur orkuráð umsóknirnar ásamt umsögnum til umfjöllunar og afgreiðslu. Afgreiðslur orkuráðs eru í formi tillagna til iðnaðarráðherra. Með tillögum til iðnaðarráðherra um hvaða umsóknir skuli hljóta styrki skal einnig fylgja listi yfir þær umsóknir sem ekki er lagt til að verði styrktar og af hvaða ástæðu.
10. Skrifleg afgreiðsla iðnaðarráðherra er hin endanlega afgreiðsla umsókna og er hún tilkynnt Orkusjóði og umsækjanda.

Skilyrði fyrir útgreiðslu styrkja Orkusjóðs.

1. Fyrirliggjandi sé staðfesting iðnaðarráðherra á styrkveitingunni.
2. Fyrirliggjandi sé skrifleg staðfesting á að fjármögnun hafi gengið eftir eins og gert var ráð fyrir í umsókn.
3. Fyrirliggjandi sé skrifleg staðfesting um að verk sé hafið.

Útgreiðsla styrkuppþæða.

1. Styrkir Orkusjóðs greiðast í þrennu lagi þ.e. þremur jöfnum greiðslum.
2. Fyrsta greiðsla (1/3) styrkuppþæðarinnar fer fram við upphaf verks.
3. Önnur greiðsla (1/3) er innt af hendi þegar styrkþegi metur það svo, að verk sé hálfnað og sendir greinargerð eða áfangaskýrslu þar um til Orkusjóðs.
4. Heimilt er að leita umsagnar Orkustofnunar á áfangaskýrslu eða greinargerð styrkþega áður en önnur greiðsla styrks er innt af hendi.

5. Þriðja greiðsla (1/3) fer fram þegar styrkþegi hefur skilað lokaskýrslu um verkefnið.
6. Áður en lokagreiðsla er innt af hendi skal lokaskýrsla eða greinargerð yfirfarin af Orkustofnun.
7. Niðurstöður og lokaskýrslur verkefna sem styrkt hafa verið af Orkusjóði skulu öllum aðgengilegar. Skýrslurnar skulu varðveittar á Landsbókasafni og bókasafni Orkustofnunar.

**Útlánakjör Orkusjóðs sbr. 6. gr. reglugerðar um Orkusjóð nr. 514/2003,
skilyrði fyrir lánveitingu úr Orkusjóði og verklagsreglur við afgreiðslu
lánumsóknna sbr. 3. gr. reglugerðarinnar.**

Jarðhitaleitarlán – lánskjör Orkusjóðs.

1. Láns hæfur kostnaður telst sannanlegur undirbúningskostnaður svo sem ráðgjöf jarðvísindamanna og forkönnun svæðis, aðstöðusköpun á borstað og jarðborun. Við mat á láns hæfum kostnaði skal tekið tillit til þess hvort undirbúningur jarðhitaleitarinnar hafi að einhverju leyti verið styrktur af opinberu fé.
2. Lán Orkusjóðs skulu verðtryggð miðað við neysluverðsvisítölu
3. Lán Orkusjóðs skulu veitt gegn veði í öllum eignum fyrirhugaðrar hitaveitu, bújörð og eða öðrum eignum sem orkuráð metur fullnægjandi.
4. Lánsupphæð nemur að hámarki 60% af láns hæfum kostnaði.
5. Lán eru veitt til allt að 10 ára.
6. Vextir af lánum Orkusjóðs eru 6%

Skilyrði fyrir lánveitingu - verklagsreglur við afgreiðslu lánumsóknna.

1. Meginreglan er sú, að ekki er veitt lán til framkvæmda eða borana nema lánumsókn hafi borist áður en í þær var ráðist og umsóknin fengið umfjöllun og afgreiðslu samkvæmt reglum þessum.
2. Sé lán samt sem áður veitt vegna sérstakra aðstæðna þá fellur niður möguleiki á niðurfellingu lánsins að hluta til eða öllu leyti skv. 7. grein reglugerðar um Orkusjóð nr. 514/2003.
3. Við undirbúning jarðhitaleitarinnar og eftirfarandi borunar skal umsækjandi leita ráðgjafar viðurkenndra jarðvísindamanna og skulu niðurstöður þeirra fylgja umsókn. Í umsögn jarðvísindamanna skv. 1. ml. skal skýrt tekið fram hver sé áætluð afkastageta svæðisins og einstakra borhola eftir því sem við á.
4. Kostnaðaráætlun fyrir væntanlega hitaveitu skal lögð fram með lánumsókn. Í kostnaðaráætlun skal tekið fram hvaða forsendur eru lagðar til grundvallar þ.m.t. um líklegan fjölda tengdra notenda og hvort ætla megi að einhverjir kjósi að standa utan hitaveitunnar.
5. Hagkvæmniútreikningar samkvæmt reiknilíkani Orkusjóðs skulu fylgja umsókn.
6. Í hagkvæmniútreikningunum er áætlað orkuverð frá hinni fyrirhuguðu veitu borið saman við það verð sem greitt er nú svo og aðra mögulega orkukosti. Skilyrði fyrir lánveitingu er að áætlað verð hinnar nýju veitu komi jákvætt út úr þeim samanburði.
7. Þegar fyrir liggja öll áskilin gögn frá umsækjanda skal leitað umsagnar Orkustofnunar um umsóknina og þau gögn og útreikninga er henni fylgja.
8. Að fenginni umsögn Orkustofnunar afgreiðir orkuráð umsóknina. Höfnun lánumsóknar er tilkynnt umsækjanda bréflega.
9. Tillögu til ráðherra um lánveitingu skulu fylgja afrit þeirra gagna sem fyrir lágu við afgreiðslu orkuráðs.
10. Frágangur láns skjala, þinglýsing og útgreiðsla lánsupphæðarinnar fer ekki fram fyrir en

staðfesting ráðherra liggur fyrir svo og staðfesting á framvindu verksins, sem unnið hefur verið í samræmi við ráðgjöf jarðvísindamanna, sem aflað var og fyrir lá við afgreiðslu lánsúmsóknarinnar.

Ofangreindar reglur eru hér með staðfestar á grundvelli 2. mgr. 3. gr. og 6. gr. reglugerðar nr. 514/2003 um Orkusjóð og taka gildi nú þegar.

Iðnaðarráðuneytinu, 2. mars 2004.

Valgerður Sverrisdóttir.

Kristján Skarphéðinsson.

AUGLÝSING

um deiliskipulög í Sveitarfélaginu Árborg.

Lóð í Götuhúsatúni á Stokkseyri, fjarskiptamastur.

Í samræmi við skipulags- og byggingarlög nr. 73/1997, með síðari breytingum hefur bæjarstjórn Sveitarfélagsins Árborgar samþykkt þann 11. febrúar 2004 tillögu að deiliskipulagi fyrir lóð undir fjarskiptamastur í Götuhúsatúni á Stokkseyri í Sveitarfélaginu Árborg.

Á lóðinni mun rísa 16 metra fjarskiptamastur og 9 m² tækjahús.

Tillagan var sett fram í mkv. 1:2000 þann 25. nóvember 2003 og auglýst í samræmi við 25. gr. skipulags- og byggingarlaga nr. 73/1997, með síðari breytingum, frá 3. desember til 31. desember 2003 og var athugasemdafrestur til 14. janúar 2004.

Engar athugasemdir bárust.

Suðurbyggð, íbúðarhverfi A,B,D og E, á Selfossi.

Í samræmi við skipulags- og byggingarlög nr. 73/1997, með síðari breytingum hefur bæjarstjórn Sveitarfélagsins Árborgar samþykkt þann 11. september 2002 tillögu að deiliskipulagi fyrir Suðurbyggð, íbúðarhverfi A, B, D og E, á Selfossi í Sveitarfélaginu Árborg.

Í Suðurbyggð mun rísa blönduð íbúðarbyggð samtals 348 íbúðir.

Tillagan var sett fram í mkv. 1:1.000/1:10.000 þann 2. maí 2002 og auglýst í samræmi við 25. gr. skipulags- og byggingarlaga nr. 73/1997, með síðari breytingum, frá 30. maí til 28. júní 2002 og var athugasemdafrestur til 12. júlí 2002.

Engar athugasemdir bárust.

Uppdrættir og greinargerðir fyrir báðar deiliskipulagstillögurnar hafa hlotið þá meðferð sem skipulags- og byggingarlög mæla fyrir um.

Deiliskipulögin taka þegar gildi.

Selfossi, 1. mars 2004.

Bárður Guðmundsson, skipulags- og byggingarfulltrúi.